

Nº 8, Inverno de 96/97 300 pta

Revista Galega para a Solidariedade

Outrasvozes



Timor!

- A Escola das Américas • Eleizóns en Nicaragua • Entrevista ao sub Marcos • Noam Chomsky: as intervencións humanitárias • Comércio de armas e axuda ao desenvolvemento

se mais asentados e con mellores perspectivas de futuro.

As maiores alegrías levamos-las co funcionamento das diferentes comunidades ou cooperativas, por exemplo na zona do Terrón cando chegamos o ano pasado os norteiros levaban escasamente unhas semanas na zona, e as relacións coa comunidade de antig@s habitantes aínda estaban por facerse, con moitas dúbidas sobre a aceptación da xente chegada de fora e a posibilidade de traballo conxunto; agora, ao cabo dun ano existe unha cooperativa única funcionando no Terrón e nela participan tod@s @s habitantes da zona, @s norteiros@s e @s antig@s, o Presidente é un nativo.

Na nosa estancia falamos muito con el@s, dos seus problemas e dificultades, das súas necesidades, dos proxectos nos que poderíamos botar unha man, das nosas esperanzas conxuntas no cambio das cousas. Fixemo-lo coa seguridade mútua de que os esforzos merecen a pena. Unha nova brigada á Illa Zapatera. □

Antonio Pérez Casas

Himno de Zapatera

Adelante marchemos campesinos
vamos a entrar en la isla.
vamos a jugar un partido,
no importa si ganamos o perdemos
lo que importa es quedarse en la isla.
Y lo peor vamos a esperar,
que nos puedan desalojar, y
si al Norte nos fueran a botar
nuevamente aqui vamos a regresar.
Juntos vamos a luchar.
Juntos vamos a trabajar.
Verde y azul la bandera que a todos nos va a cobijar.
Verde y azul la bandera que a todos nos va a cobijar.
Adelante marchando en los trabajos,
sigamos organizados
no importa que se oigan rumores
si nos vuelven a desalojar,
mi consigna es terquedad.
Y lo peor vamos a esperar,
que nos puedan desalojar
y si al Norte nos fueran a botar
nuevamente aqui vamos a regresar.
Juntos vamos a luchar
Juntos vamos a trabajar.
Verde y azul la bandera que a todos nos va a cobijar.
Verde y azul la bandera que a todos nos va a cobijar.

Letra e música de Silvano (La Habana, Zapatera, Nicaragua)

De San Luis de Manares ao Mombacho: história dunha ocupación

O que segue é a transcripción dunha charla que a brigada organizada polos Comités de Solidariedade tivo con Wenceslao Chavarría en San Luis de Manares (Granada) en agosto de 1996. Nela fai un repaso á historia da emigración dos "norteiros", por causa dos asasinatos selectivos da "Recontra" (anti-sandinistas financiados pola Alianza Liberal de Arnoldo Alemán, que ten o apoio dos EUA e da reacción anticastrista de Miami [Mas Canosa]), iniciada alá por 1991, e cuxos últimos exponentes son os labregos e labregas que ocuparon as terras coñecidas como "Mombacho". O autor tamén fai referencia á súa historia persoal, desde os tempos da revolución, o que nos permite situar o conflito na súa perspectiva histórica.

Os anos da revolución

Durante os anos do goberno revolucionario, eu, como a maioría das persoas que nos viñemos do norte, estivemos traballando na zona de guerra. Mas, como en toda guerra, só se

poden contar traxédias desa época. Eu estiven como quince anos de guerra, porque antes da guerra da Contra, eu integrara-me na guerra de liberación. Despois do triunfo, tivemos paz só por dous anos. Durante eses dous anos, a revolución marchou ben, a xente recibía axudas para traballar. Aquelo era bonito. Mas no 82-83, comezou outra guerra. Despois do triunfo da revolución, eu traballei na organización do campesinado, que estaba moi desorganizado, constituindo cooperativas. Moitas delas fracasaron, e nós mesmos temos parte da culpa do fracaso, durante o goberno revolucionario, porque se lles entregaron as terras aos campesinos sen eles pedi-las; non era a súa reivindicación, e polo tanto non se sentían involucrados. Usaban a terra, logo a abandonaban. Non é o mesmo loitar por algo e conservá-lo, que recibí-lo sen mais.

Fun vicealcalde dun municipio, de Waslala [Región Autónoma Atlántico Norte]. Cando a guerra entrou de cheo, tivemos que coller as armas e loitar, desde o exército. Se non fora pola guerra, eu houbera buscado un traballo para vivir tranquilo. Mas había que loitar, integrar-se á loita, para man-



ter o conseguido. Por iso aínda agora loitamos, para que outra xente polo menos sobreviva. A guerra non parou. No norte seguen asasinando campesinos. Aínda que o goberno diga que non hai guerra, iso é mentira. Por iso a xente segue emigrando, en busca dun sitio onde traballar en paz, ou simplemente onde sobrevivir. Porque a guerra trae problemas económicos, a desunión das familias. A guerra leva varios anos e non hai esperanza de que se pacifique a zona.

San Luis de Manares

A maior parte da xente de aquí ven de Waslala, do norte. Os primeiros que viñemos aquí estivemos viaxando e vivendo en varias partes, buscando terras onde sementar. Estivemos a carón do mar, en La Trinidad [departamento de Carazo]. Ali sementamos millo, sorgo, feixóns, mas ali non se dan ben, e non podemos colleitar nada. Daquela seguimos buscando outras alternativas, para poder traballar, e chegamos a Jinotepe, onde estivemos vivendo outra temporada. Ali non tiñamos terras. Por fin contactamos con algunha xente que coñecía estas terras, e nos ofreceron unhas terras perto do volcán [Mombacho, departamento de Granada], en Nandaime. Ali estivemos uns días, mas nos enganaron: non dos deron a terra que prometeran. Seguimos loitando, buscando terras noutro lado. Viñemos aquí a San Luis. Estas terras estaban arrendadas pola ATC [Asociación de Traballadores do Campo, sindicato labrego sandinista]. Deron-nos unha parte da terra, unhas 70 *manzanas*. Mas cando xa tiñamos sementado, desaloxaron-nos de ali; non lles conviña a nosa presenza e chamaron á policía para desaloxar-nos do parque [de Granada]. Estivemos protestando ali no parque varios días. Tiñamos tomado a casa da gobernación. Unha vez desaloxados levaron-nos a Masaya. Ali estivemos outros días, con toda a familia. Estábamos unhas cuarenta familias. Despois viñemos tomar as terras de novo. Aquí nos metimos outra vez, e tivemos que negociar coa ATC. Despois de tanto loitar, por fin nos concederon o dereito ás terras. Deron-nos polo menos 600 *manzanas*, que era o que nós pedíamos. Unha vez que eles

se retiraron, ficaba negociar co goberno, para conseguir os títulos de propiedade. Levamos xa aquí cinco anos. E este ano deron-nos unha parte só da asignación das terras, que título tam pouco temos.

Cando chegamos aquí estábamos nunha situación crítica, sen nada; somente trouxemos as crianzas e o que



Wenceslao Chavarria

pudemos cargar no camiño, para sobrevivir. Unha vez instalados aquí, contactamos coa UCA [Unión de Cooperativas Agrarias], que nos axudou bastante. Agora cada quen ten o seu pozo, cultiva os seus plátanos (a UCA deu-nos a semente). Deron-nos tamén a cada familia unha vaca parida. Agora todos teñen máis de dúas ou tres, despois de devolverlle á UCA o préstamo cunha cria. E con estas axudas fomos saíndo adiante. Este ano tivemos problemas coa alimentación, porque nos queimaron todas as hortas, xente de aquí, que non simpatiza con nós. Este ano quedamos arruinados. Mas agora xa está saíndo o millo.

O Mombacho

Nós chegamos nunha situación máis crítica que na que están agora os do Mombacho [norteños chegados en maio de 1996, e instalados ao pé do volcán, perto de San Luis de Manares, e que están a sufrir problemas de alimentación; son unhas 50 familias; 1700 *manzanas*, 70% para gando (que aínda non teñen), 30% agrícola, porque eles xa tiñan contactos aquí cando chegaron, xa estábamos nós, e están a recibir axuda. Nós demos-lles albergue,

despois de viren-se de Zapatera; cada quen acolleu a unha ou dúas familias na súa casa, durante un tempo. Aos de Aguas Agrias [outra comunidade cercán, chegados do norte hai cinco anos, despois dos de San Luis de Manares, e que ocuparon parte dunha finca privada, propiedade de Roberto Mejía] tamén lles déramos albergue. E xa non é o mesmo vir e topar-te cun amigo, que chegar aquí sen ter a ninguén. Os do Mombacho claro que teñen agora un problema de alimentación, mas polo menos teñen o apoio da xente. E tamén están dispostos a loitar por obter a terra. A empresa Camilo Ortega [unha cooperativa da ATC, onde se encontran as terras de San Luis de Manares e Mombacho] era grande, tiña máis de 7000 *manzanas*. Co cambio de goberno [cando o FSLN perdeu as eleicións en 1990], houbo xente dentro da Frente que se aproveitou da situación, e entre uns cuantos elementos colleron toda a terra. Todo o que era gando, algunha maquinaria, etc, desapareceu. E a terra, que era o último que quedaba, tamén a tiñan acaparada. De toda a facenda, nós recuperamos esta parte [San Luis de Manares] e a do Mombacho, pola que estamos loitando agora. Non é xusto que uns 108 sócios [da ATC] queiran ter todas as 7000 *manzanas*. Estas terras foran privatizadas a favor do traballadores, mas agora os traballadores non teñen terras. Se non fora por esta loita, moitos dos traballadores que vivían aquí quedarían sen nada; agora teñen o que lles podería corresponder. Na nosa loita nós sempre respeitamos aos que viven na terra e a traballan. Todo o mundo ten dereito a ter un pedazo de terra e vivir de el. Non creo que haxa máis emigración do norte a estas terras, porque as últimas terras ociosas as collimos nós. Hai grandes facendas, mas son privadas (aínda que conseguimos parte da finca privada de Roberto Mejía, o que agora é Aguas Agrias).

Organización

Aquí en San Luis somos unhas trinta familias. En Aguas Agrias, outras 30 familias. Aquí funcionamos como dúas cooperativas (aínda que legalmente somos unha só). Traballamos de dous xeitos diferentes. Todo o que é a gandería traballa-se colectivamente. Temos unhas trintaecino cabezas. Mas logo



cada familia ten unha parcela pequena, onde se ubica a casa e a horta, onde se cultiva todo para comer. Hai dous comedores colectivos, un en cada cooperativa, que o levan as mulleres. Neles comen polo menos unhas sesenta crianzas. As mulleres tamén traballan nuns pequenos hortos familiares, para axudar nos comedores.

A escola conseguimos-la ao ano, o que é a construción do edificio, coa axuda dun organismo canadiano, que tamén axudou co centro de saúde. Eles puxeron o material, e nós a mao de obra. Mas mestres conseguimos-los hai tres anos. Os dous primeiros anos negaron-se a dar-nos mestre. Fixemos unha protestas, coas crianzas, e así conseguimos os mestres.

Perspectivas

Cando nós loitamos contra a ditadura, foi pola posesión da terra. Con Violeta [Barrios] no poder, o problema seguiu igual, o campesinado segue oprimido, desaloxado das terras, perseguido. Durante os anos da guerra coa Contra non sufrimos tanto como co goberno de dona Violeta; porque agora si pasamos fame. Agora non hai nengun traballo. Dentro da Frente Sandinista, son as bases as que se mobilizan agora, as que loitan, porque os dirixentes se desentenderon bastante do problema da terra, e de dar-nos apoio. Os dirixentes rexionais de Granada non só non nos apoiaron, senón que mesmo nos denunciaron. Sempre que houbo algun desaloxo aquí, polo menos algun dos dirixentes rexionais tivo algo que ver. Eles teñen o que teñen, e deixaron ao pobo que se defende como poda. E iso é duro. Despois de quince anos de loita pelexando ombro con ombro, ves como che dan as costas, e un sinte-se molesto. Sandino, que era un campesino que loitou, xa advertira sobre os que abandonan a loita unha vez que conseguen posición. Aínda que a Frente gañara as eleicións, é difícil que faga algo polo campesinado. O campesinado sempre terá que loitar para obter o que se propón. O único que prometen é non desaloxar aos que xa teñen terras. A loita ten que seguir, a reforma agraria ten que continuar. Mentres haxa xente sen terra, a loita non vai parar, sexa a Frente ou sexa quen sexa quen estexa no poder. O campesino vive da terra, e se non lla dan, ten que loitar por ela. Cando solicitas algo, nunca che dan unha resposta. É só cando vas polas malas que consegues que che respondan. Iso é o que aprendimos; a maior parte da xente aquí sabe loitar, sabe defender-se, tanto con armas como sen armas. Antes era máis difícil, xa polo só terror que se lle tiña á ditadura. Agora non lle temos medo a falar-lle a calquer, ou a reclamar o que nos corresponde. Aínda que aquí no sul hai menos tradición de loita, e a nosa batalla é máis difícil. Aquí non se viveu a guerra. Mas conseguimos gañar-nos a algúns nativos, que agora traballan connosco. Calquer goberno que veña, ten que respectar ao campesino. Aínda que moitas esperanzas de cambios por parte do goberno non hai. Claro que hai diferencias entre a Frente e Arnoldo Alemán, porque Arnoldo Alemán vai querer recuperar as terras confiscadas durante a revolución. De feito xa hai xente que pola imposibilidade de traballá-las entregou as súas terras. Mas aos que se quedaron con elas, é difícil que llas quiten. □

Wenceslao Chavarria

Transcripción: Alberte Pagán

ELEIZÓNS'96

Crónica dun fraude anunciado

Queridos señores guardiáns de bandullos:

Onde están as "boletas" misteriosamente desaparecidas, onde foron parar as "boletas" eleitorais queimadas, rompidas, trocadas por outras (que foron previamente imprensadas en Costa Rica), as "boletas" atopadas en casas de particulares ou espaxadas polos vertedoiros de Managua?


De onde viñeron as "boletas" eleitorais noviñas do trinque que entraron pola porta de atrás (ou pola porta de adiante, se temos en conta que era policía costarricense a que "tomou" aquel lugar) do BANIC da Praza Centro-América en Managua, lugar habilitado polo CSE para revisar e recontar "boletas", actas, etc., co obxectivo de, tras as reclamacións de máis de once partidos políticos, facer cadrar actas e "boletas" cos resultados eleitorais dados xa por definitivos nos mass media de medio mundo? Facé-los cadrar? Nen o mesmísimo Pitágoras, mago dos números tería podido acadar tal meta.

Pois ben, estas e outras preguntas só as poden responder vós, señores do bandullo, donos de estómagos alleos, de estómagos que pasan fame. Pola nosa banda, nós, entremetres agardamos pola súa famélica resposta, imos propor unha de noso: Nicaragua xa non está de moda porque vós, señores de bandullos inchados de fame e guardas dos bandullos de seu, decidiron que así fose, quizá para prever que algunha mente quente de máis chegase á conclusión de que vós tiñan a intención de facer-se co dominio do país á custa de eleicións flatulentas (perdón, fraudulentas). Porque xa hai quen deu en pensar que para poderen seguir de "enchenta", precisaban colocar no poder, sen o poder dos votos, o bandullo presidencial por excelencia, Gordomán Arnoldo Alemán, o rei dos bandullos.

Nicaragua xa non está de moda, dicíamos. E aventuramos outra resposta, só por probar sorte: non está de moda porque alí xa non hai unha revolución en marcha que lle tire o sono ao amigo do Norte, porque xa non compre mirar con lupa ese país para tratar de cazar comunistas por todos os recantos dos cuartos e mesmo debaixo das camas. O "amigo" do Norte quedou máis ou menos tranquilo e recuperou o sono tras as eleicións de 1990, unhas eleicións nas que, por certo, non se "perderon boletas" nen actas eleitorais nengunhas, e tampouco se adiaron os resultados oficiais dúas semanas e meia (coñecen algun caso así nos países "democráticos de Occidente, señores "observadores" da OEA?). Unhas eleicións, as do 90, onde os perdedores (Frente Sandinista) entregaron o poder e recoñeceron a súa derrota. É dicir, case cagadiñas ás do 96.

Pero Nicaragua pasou de moda. De está-lo, todo o que sucedeu nas eleicións de 20 de Outubro de 1996 tería acadado fonda difusión, e iso non conviña, non si, señores do bandullo? Desta vez compria actuar con nocturnidade e alevosía, sen luz (que curiosamente faltou en moitas JRV o día das eleicións), sen taquígrafos, sen cámaras e sen fotos. E para iso contaron





InterNet

unha

tecnoloxía

revolucionaria

A. P.

A (des)información é unha arma de dominio. As ditaduras sempre coutan a liberdade de expresión (saben dos seus perigos); os movementos revolucionarios promoven a alfabetización da cidadanía (coñecen as virtudes do coñecemento). As vitórias ou derrotas políticas e militares dependen, cada vez mais, da información (chamemos-lle propaganda). Se Timor Leste sofre a ocupación indonésia sen que ninguén se altere, é principalmente pola falta de noticias que sobre á illa temos. Se os EUA, pola contra, inician a Guerra do Golfo, é porque a poboación mundial está escandalizada da brutalidade dos soldados iraquíes cos bebés das incubadoras dos hospitais kuwaitis, e saben do seu apoio.

É o que Chomsky chama a "fabricación do consentimento", e o mellor exemplo é o mencionado dúas liñas arriba: para provocar a guerra (do Golfo), as partes interesadas non se cortan en fabricar acontecementos falsos (o roubo das incubadoras, neste caso), que provocan a indignación dunha poboación (a de EUA) até ese momento indiferente á invasión, e que constitúen en última instancia o pistoletazo de saída para os bombardeiros.

Os gobernos poden facer calquer cousa que se lles antolle: só teñen que convencer á maioría da cidadanía da bondade dos seus proxectos, por mui selvaxes que estes sexan. Exemplos como os da guerra do Golfo abundan no último cuarto de século. Ao final sempre se descobre a verdade (que o roubo das incubadoras nunca existiu), mas en letra pequena e sempre demasiado tarde, cando xa non hai remedio para os centos de milleiros de civís asasinados por ocidente. Ante isto, indignar-se ante un atentado "terrorista" non deixa de ser hipócrita. E a raíz dos brotes violentos, no fondo, non deixa de ser unha chamada de atención, un dicir "estamos aquí e hai este problema", un buscar un oco nesa maraña de información que ás veces oculta mais do que mostra.

*Quizá a polémica
sobre a pornografía na
rede non sexa mais
que unha tapadeira
para prohibir outro tipo
de contidos.*

Na era da internet, a relación de poder (de información) entre opresores e forzas rebeldes está empezando a cambiar. O exemplo óbvio é o acontecido en Chiapas a partir do 1º de xaneiro de 1994: un exército indíxena mal armado non crea ningún problema militar a un exército como o mexicano. Despois de dous anos, os zapatistas seguen a negociar, e seguen a ocupar portadas de revistas (non tanto como desexarian, mas si o bastante como para resultar sorprendente). E todo grácias ao uso dunha soa arma: os comunicados, que agora chegan en cuestión de segundos a todos os rincóns do planeta, e que substitúen aos fusis. Mesmo durante os cercos militares que os zapatistas sufriron, chegaba ao outro lado información deta-

llada sobre o mínimo enfrentamento con ou ataque de os soldados. E ante a verdade crua, poucos gobernos se atreven a usar os vellos métodos represores.


Mas os zapatistas non están, nen muito menos, sós nesta revolución via internet. Os Tigres de Liberación de Tamil Elam, desde Sri Lanka, envían información diaria por medio de teléfonos via satélite a TamilNet, o servidor de internet creado en 1995 que actúa desde Noruega. A Unión Revolucionaria Nacional Guatemalteca, desde a selva guate-

malteca, manda información a México, desde onde se distribue por internet ao resto do mundo. Desde Timor Leste tamén se lograron certos avances na loita contra a represión indonésia grácias a internet.

Cada vez mais axencias de prensa fían-se mais dos datos distribuídos polos movementos armados que dos datos oficiais, nunca coincidentes. Un exemplo temo-lo en The Washington Post ou o International Herald Tribune, que xa comezan a citar como fonte os boletíns dos Tigres de Liberación de Tamil Elam, ao tempo que non se fían muito das axencias de prensa oficiais de Sri Lanka. Nun ataque a un

campamento militar, os Tamiles declararon te-lo tomado, causando a morte a mais de 1000 soldados. O goberno de Sri Lanka só recoñeceu 70 baixas. Os xornais citados deron como válidos os primeiros dados.

Mas todo avance democrático ten que esperar-se unha contraofensiva: nos EUA xa se está a barallar a posibilidade de prohibir a circulación de este tipo de información (e quizá a polémica sobre a pornografía na rede non sexa mais que unha tapadeira para prohibir outro tipo de contidos), acudindo a leis "anti-terroristas" ou delitos como a "aproxia do terrorismo". □



Dous encadres dunha maxe de Internet que anuncia a captura de Leslie Isden Rogge



Alguns dos moitos servidores de Internet nos que se pode topar información actualizada sobre movementos armados

► **East Timor Action Network** (Rede de acción de Timor Leste)

<http://shell.ihug.co.nz/~calliope/Nettalk.html>

Unha boa noticia, por fin: a concesión do premio Nobel da paz a dous loitadores pola independencia de Timor Leste, José Ramos Horta (delegado no exterior da resistencia timorense) e Filipe Ximenes Beleo, o que puxo, por un momento, o tema da represión indonésia da illa nas páxinas dos xornais. Para máis información sobre Timor Leste, ou sobre outros servidores de Internet sobre o tema, ver o número anterior de **OUTRASVOZES** (primavera-verao 96), dedicado exclusivamente á loita do pobo timorense.

► **Sri Lanka: TamilNet** (Rede Tamil)

<http://www.sn.no/~cyrinus/>

Desde Noruega, dados sobre a guerrilla Tamil que loita pola independencia da península de Jaffna, en Sri Lanka.

► **Mexico: Zapatista**

<http://www.utexas.edu/students/nave/>

Suscrever-se ás últimas novas enviando esta mensaxe: "subscribe shiapas95"

a: majordomo@eco.utexas.edu

► **Rede zapatista de autonomía e liberación**

<http://www.actlab.utexas.edu:80/~zapatistas/>

Mais información sobre Chiapas, con imaxes, sons e textos.

► **The Committee to Support the Revolution in Peru** (Comité de apoio á revolución no Peru)

<http://www.calyx.com/~peruweb>

Información sobre o Partido Comunista do Peru, desde os EUA.

► **Cuba Solidarity Web Site** (Servidor de Solidariedade con Cuba)

<http://www.igc.apc.org/cubasoli/>

Información sobre Cuba, para ver a outra cara da moeda. Patrocinado polo Institute for Global Communications.

► **Institute for Global Communications** (Instituto para a comunicación global)

<http://www.igc.apc.org/>

► **Sinn Fein**

<http://www.serve.com/rm/sinnfein/index.html>

► **Angry Planet** (Planeta indignado)

<http://www.wave.no/angry/>

Axencia de noticias e fotos, sobre o mundo non industrializado e os seus activistas políticos.

► **The Noam Chomsky Archive** (O arquivo de Noam Chomsky)

<http://www.lbbs.org>

Oferece ampla información sobre o disidente estadounidense e a súa obra.

O cliente sempre ten a razón

A. P.

O mundo é un gran mercado. E xa sabemos o inflexíveis que son as leis do mercado. No nome do Mercado fan-se guerras (a do Petróleo, perdón: a do Golfo), golpes de estado (o das minas de Chile, Pinochet), venda de países, devaluacións, dévedas externas, políticas sociais (perdón: económicas), etc. Mas un mercado sen compradores ven-se abaixo, e ese é o talón de Aquiles das multinacionais (multinacionais, lembremos, que en moitos casos son máis poderosas que moitas nacións-estado). O boicot é unha arma que as grandes empresas temen, a pesar de que o/a comprador/a é un ser individual. A decisión de comprar ou non comprar un produto, así en frío, non ten aparentemente máis transcendencia. É como facer dúas fotocópias en vez de unha: non cremos que ese pequeno despilfarro vaia cambiar en nada o ritmo da tala dos bosques. E aquí quizá pequemos de ignorar o noso verdadeiro poder como compradores. O noso poder estritamente político reduce-se ao depósito dunha papeleta nunha caixa cada catro anos. O noso poder na esfera económica é maior: mercamos e escollemos produtos todos os días.

Os boicots a empresas teñen servido para mellorar un pouco o mundo. Non debemos desprezar o papel xogado polo boicot a Sudáfrica no cambio de rexime nese país; e tampouco temos que malinterpretá-lo: non se tratou de que certas empresas boicotearan o goberno racista por vontade propia, senón que se viron "obrigadas" a facé-lo, en moitos casos, polo boicot sufrido polas mesmas empresas por parte dos consumidores occidentais para forzá-las a retirar-se de Sudáfrica (aínda que Barclays Bank tardara 17 anos en pechar as súas sucursais sudafricanas, en 1986). Jean-Luc Godard reflectía perfectamente o papel do/a consumidor/a na súa película *Tout va bien*, na que avogaba polo furto nos supermercados como práctica subversiva. Algo semellante acontecera nas revoltas estudantis compostelás dos anos setenta, durante as caíais grupos de estudantes acudían a restaurantes ou supermercados e cargaban o consumo á conta do reitorado.

Alguns boicots nunca van arriba. Outros teñen un éxito propagandístico e inciden na realidade dun xeito excepcional. O último gran boicot foi o que sufriu a empresa Shell ante a súa pretensión de depositar residuos contaminantes no mar do Norte. A maior ou menor repercusión ambiental destes residuos é o de menos: o importante é o efecto do boicot interna-

cional: a empresa perdeu un 70% de vendas, á parte do desprestixio de Shell. Este boicot centrou-se sobre todo en Alemaña e Escandinavia, países cunha maior preocupación medioambiental. A Shell tamén está a sufrir outro boicot pola súa inhumanitaria explotación petrolífera das terras dos ogoni, en Nixeria, país no que apoia o réxime militar e polo tanto a execución do activista e escritor Ken Saro-Wiia.

En Gran Bretaña, onde o interese polo ben-estar dos animais é maior, un dos boicots de máis éxito a nivel mundial foi o da campaña anti abrigos de pel: raramente vemos hoxe en día persoas levando-os polas ruas británicas, e xa non hai tendas que os vendan. E lembremos que xa hai uns sete millóns de vexetarianos/as no Reino Unido, cando hai só uns poucos anos non eran máis da metade. A saber que significa isto en termos económicos para as empresas que manufacturan carne. En relación co tema dos animais, o porto de Dover está a padecer un

boicot por consentir o transporte de animais vivos; e Gillette, por facer probas con animais; e moitas compañías aéreas, tamén polo transporte de animais (monos) para a investigación.

Outras empresas que sofren ou sufriron boicots organizados son: a Heineken, por certas declaracións racistas dun membro da directiva. Texaco, por partida triple: por promover a explotación do bosque amazónico de Ecuador; por non admitir na súa nómina a seropositivos; e pola súa colaboración coa ditadura de Rangun. Mitsubishi, por promover a tala de bosques tropicais. Os bancos en xeral, e as tarxetas de crédito en particular, polo papel dos primeiros na débeda externa dos países non industrializados. Marrocos, pola súa ocupación do Saara. Indonésia e os seus produtos, pola súa ocupación de Timor Leste. Nestlé, por incumplir certos acordos na comercialización do leite en polvo. Etc, etc.

Éxitos dos boicots: a Shell rectifica e non verte os residuos no mar do Norte; Sudáfrica ten un presidente negro; Nestlé, despois do boicot de 1980-84, cede e atén-se ás normativas; o boicot reanuda-se en 1989 por volver ás andadas; Franza completa as súas probas nucleares en Mururoa, mas pensará-o dúas veces antes de facer unha nova ronda de probas, e de todos xeitos o éxito propagandístico antinuclear foi total. Para calquer empresa, o mínimo descenso nas vendas é un éxito para o/a consumidor/a.

Así que xa o sabedes: o cliente sempre ten razón. □

O boicot é unha arma que as grandes empresas temen, a pesar de que o/a comprador/a é un ser individual. A decisión de comprar ou non comprar un produto, así en frío, non ten aparentemente máis transcendencia. E aquí quizá pequemos de ignorar o noso verdadeiro poder como compradores.